

Gobernuaren «seriotasuna» nabarmendu du EAK

Lasagabaster diputatua Zarzalejosekin batzartu zen atzo

Agentziak / Madril

Begoña Lasagabasterrek «seriotasun handia eta prozesuarekin aurrera jarraitzeko erabaki sendoa» ikusten du Espainiako Gobernuarengan. EAKo diputatua Javier

Zarzalejos Gobernuko ordezkariarekin bildu zen atzo, bake prozesuaren inguruan hitz egiteko. Kale istiluen gainera, «Gobernuak prozesuarekin jarraitzeko erabakia hartu izana» garrantzitsutzat jo zuen Lasagabasterrek.

ASTE honetan abiatu du Zarzalejosek elkarrizketa txanda alderdiekin bake prozesuaren inguruan hitz egiteko. Presidentziarako idazkari nagusia zenbait alderditako ordezkariekin bildu da, asteazkenean Iñaki Anasagasti EAJko diputatuarekin hain zuzen. Atzo, berriz, Eusko Alkartasunaren txanda izan zen. Bi ordu iraun zuen Lasagabasterrek Zarzalejosekin egin bilerak, eta handik irtean EAKo diputatuak esan zuen Gobernuarengan «seriotasun handia eta erabakitasuna» ikusi zuela. Hala eta guztiz zailtasunak eta gora-beherak izango direla onartu zuen. Bere ustez Gobernu eta alderdien arteko bilerak «emankorrak» dira bata besteari informazioa ematea ahalbidetzen dutelako.

Bake prozesuak aurrera egiteko etengabeko elkarrizketa beharrezkoa dela iritziz dio Lasagabasterrek. Elkarriketak inor ez duela bazterrean utzi behar ere esan zuen EAKo kideak. Bakera heltzeko jarraitu beharreko pausuen artean presoek hurbiltzea aipatu zuen. Gobernuari horrela jakinarazi ziola



ANGEL MILLAN / EFE

Begoña Lasagabaster, atzo, bileratik atera ostean adierazpenak egiten.

azaldu zuen Lasagabasterrek. Era berean kale istiluak prozesuari ez diotela laguntzen azaldu zuen eta horregatik «Gobernuak prozesuarekin jarraitzea erabaki izana garrantzitsua» jo zuen. Gai horretan EAK tinko jokatu duela azaldu zuen Lasaga-

basterrek eta EHri adieraziko diotela ez daudel prest indarkeria onartzeko.

Zarzalejos CiUko Joaquín Molinsek ere bildu zen atzo arratsaldean, Bilera ostean Molinsek esan zuen babes osoa eman ziola. Gobernuak orain arte jarraitu duen politikari eustea egoki ikusten du CiUk.

Mahaikide presoek 3. gradua ez ematea erabaki dute

■ Basauri, Langraitz eta Iruñeko batzordeek ez dute gradu aldaketa aholkatuko

Agentziak / Bilbo

BASAURI, Langraitz eta Iruñeko espetxeetako tratamendu batzordeek bertan dauden HBko 14 mahaikideak bigarren graduan iraunaraztea ebatzi dute. Aurreko asteetan hirugarren graduan jartzea aholkatuko zutenentz luze hitz egin bazen ere, azkenean gauzak bere horretan uztea deliberatu zuten. Martuteneko batzordeak hurrengo ostegunean aztertuko du gaia. Orain hartutako erabakia sei hiletan egongo da indarrean.

HBko prentsa bulegoak

atzo gogorarazi zuen Mahai Nazionalarentzat ez daudela balio duten graduak, eta «gradu baliogarri bakarria txantaia eta baldintzarik gabeko askatasuna» dela azaldu zuen.

Beste alderdietan ere erreakzioak eragin zituen erabakiak. Hala, EAK eta IUK presoek artean dauden tratuek ezberdintasuna salatu zuten, GAL kasuan zigortutakoek kasua gogoan izanik.

Jaime Mayor Orejak, berriz, erabaki hori «erabat zuzena» izan zela adierazi zuen.

laburrean

■ Eiguren: «PSE-EEk adostasun elkarguneetara iritsi behar du euskal abertzaleekin»

JESUS EGIGUREN PSE-EEko harreman politiko eta instituzionalen arduradunak testu bat idatzi du, alderdi sozialistak Euskal Herrian jarraitu behar duen ildo politikoan sakontzeko. Legealdi honetarako estrategia berria ezartzen du agiriak, eta indar abertzaleekin adostasunera iristea du helburu. *Euskal Herria: ¿100 días para la paz?* dokumentalerako egin adierazpenetan, hau dio EHri buruz: «Ez dago inongo eragozpenik haiekiko harremana beste alderdiekin dugun ia bera izateko». PSE-EEk egin behar duenari buruz, Eigurenek adierazi zuen: «Historikoki, Alderdi Sozialistak, momentu klabeetan, euskal abertzaletasunarekin adostasunera iristen jakin du». x

■ Leoneko afera Parisen epaitzeaz kexu agertu dira abokatuak

LEONEKO afera Akizen (Landak) epaitua izan ordez Parisen egingen dela eta, beren kexua agertu dute Filipe Aramendi, Alain Larrea, Aña Mari Mendiburu, Yolanda Molina eta Yann Choucq abokatuak. Diotenez, Kasazio Ganbarak defentsari eta Filipe Bidart, Ttote Etxebeste eta Gabi Mouesca akusatuei inolako abisurik eman gabe hartu du erabakia, Paueko Ministerio Publikoaren eskariz. Abokatek ekimena salatu eta Europako Giza Eskubideen Gortera joko dutela adierazi dute. Afera honetan, jadanik, Europako Gorteak Mouescaren alde egin zuen joan den uztailan, 14 urtez afera honetan auzipetua egonik ere, auzirik egin ez zelako. x

■ Gobernuak eta CDNk akordio gehiago lotu nahi dituzte

NAFARROAKO GOBERNUA eta CDN kontent dira aurrekontu hitzarmenaren gauzatzearekin, eta hitzarmenak biltzen ez dituen zenbait gaitan ere adostasuna lortzen saiatuko dira. Hitzarmenaren Segimendurako Batzordeak bilera egin zuen atzo Nafarroako Jauregian. Ondotik, Miguel Sanz lehendakariak eta Juan Cruz Alli CDNko buruak iragarri zuten jarrera adosten saiatuko direla 35 orduko lan astearen eta Bazterketa Sozialaren Aurkako Planaren inguruan. x

■ Funtzionario batek dokumentu batzuk galdu dituelako, gazte bat ia kartzelan sartu dute

ESPAINIAKO Entzutegi Nazionalako funtzionario batek dokumentu batzuk galdu dituelako, Xabier Zaldúa donostiar gaztea kartzelatzen izan dira. Zaldúa Pasaian atxilotu zuen asteazkenean Espainiako Poliziak. Atzo Donostiako epaitegira eraman zuten, eta Martuteneko kartzelara bidali behar zutenean, poliziak akats judizialaz konturatu eta aske utzi zuten Zaldúa. Donostiako gazteak, bere garaian, lau urteko kartzela zigorra jaso zuen, baina Kode Penal berriarekin aske gelditu zen. Funtzionarioak galdu dituen dokumentuek Kode Penal berria ezartzeko balio zuten, eta horregatik gertatu da hau. x